

Na osnovu člana 24. stav 5. Zakona o šumama ("Službene novine Federacije BiH", broj 20/02), federalni ministar poljoprivrede, vodoprivrede i šumarstva, donosi

## **PRAVILNIK O NAČINU ODABIRANJA, DOZNACI I SJEČI STABALA ILI POVRŠINA ZA SJEČU**

### **Član 1.**

Ovim pravilnikom reguliše se odabiranje, doznaka i sječa stabala ili površina za sječu u šumama na teritoriji Federacije Bosne i Hercegovine.

Odabiranje, obilježavanje i sječa stabala ili površina za sječu vrši se u cilju gazdovanja šumama i šumskim zemljištima u skladu sa smjernicama postavljenim šumskogospodarskom osnovom i općim interesom u cilju poboljšanja ekoloških, ekonomskih i socijalnih funkcija šume.

### **Član 2.**

Odabiranje, doznaka (obilježavanje) i sječa stabala ili površina za sječu može se vršiti samo na površinama gdje su riješeni imovinsko-pravni odnosi.

### **Član 3.**

Odabiranje i doznaka stabala ili površina za sječu vrši se u skladu sa tehničkim ciljem gospodarenja, propisanim za konkretnu gazdinsku klasu šumskogospodarskom osnovom, i konkretnim sastojinskim prilikama.

### **Član 4.**

Nije dopuštena sječa bez prethodno izvršenog odabiranja i obilježavanja stabala ili površina za sječu i izrade i donošenja projekta za izvođenje u skladu sa Zakonom o šumama.

### **Član 5.**

Doznaka stabala u šumi podrazumijeva:

1. Obilježavanje odabranih stabala za sječu zatesom na žilištu ili na jednoj od debljih žila sa donje strane i zatesom na prsnoj visini sa gornje strane;
2. Obrojčavanje (redni broj) obilježenog stabla na žilištu;
3. Premjerba prsnih prečnika, određivanje uzgojno-tehničke i tehničke klase odabranih i obilježenih stabala te upisivanje podataka u doznačnu knjigu;
4. Stavljanje otiska šumskog, doznačnog čekića na oba zatesa uz uporabu boje (farbe) koja je različita od boje premjerbe.
5. Boja doznake mijenja se početkom svake kalendarske godine.

U knjigu doznake evidentiraju se doznačena stabla samo jednog odjela, izuzev doznake sanitarnih užitaka. Knjige doznake moraju biti obrojčene i upisane u registar.

### **Član 6.**

Obilježavanje površina za čistu sječu u izdanačkim šumama, plantažama, makijama, šikarama i šibljacima vrši se na graničnim stablima u vidu jednostrukih prstenova, širine 4 cm, izvučenih bojom slobodnom rukom na prsnoj visini (1,30 m). Granična, obilježena stabla, moraju se dogledati i ne smiju se posjeći.

**Član 7.**

Prilikom njege mladih sastojina, prirodnog ili vještačkog porijekla, stabla za sječu od 7-15 cm će se premjeravati i obilježavati tačkasto bojom na prsnoj visini i žilištu, a deblja stabla u skladu sa članom 5. ovog pravilnika.

**Član 8.**

Sječa stabala vrši se, po pravilu, uz brdo, osim ako to projektom za izvođenje nije drugačije određeno.

Izuzetno se obaranje stabala može vršiti na stranu ili niz brdo ako se na taj način:

1. Izbjegava opasnost za život uposlenika;
2. Obezbjeduje bolja zaštita sastojine;
3. Obezbjeduje oboreno stablo od oštećenja.

**Član 9.**

Visina panja može biti najviše 1/3 prečnika panja, mjereći sa gornje strane.

**Član 10.**

Nakon sječe, pristupa se izradi drvnih sortimenata, pri čemu se daje prednost izradi vrednijih sortimenata.

Kod krojenja i izrade drvnih sortimenata, mora se pridržavati standarda kvaliteta i dimenzija određenih za drvne sortimente.

**Član 11.**

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

Broj 01-02-493-1/02 29. novembra 2002. godine Sarajevo

Ministar Behija Hadžihajdarević, s. r.